



САМУРДИН

СЕЕ

«Магъарамдхуьруьн район» МР-дин
общественно-политический газет.
Общественно-политическая газета
МР «Магарамакентский район».

ГОЛОС САМУРА

Газет 1951- йисалай акъатзава. № 35 (8070) киш, 28- август, 2021- йис. Къьимет 6 манат



27- АВГУСТДИЗ «Магъарамдхуьруьн район» МР-дин Администрациядин заседанийрин залда малимрин августдин совещание кыле фена. Совещаниедикай геъенш материал чна чи газетдин къведай нумрада гуда.

ШИКИЛРА: Совещаниедин президиум, совещаниедин иштиракчяр.

ИНТЕРВЬЮ

ГЪАЗУРВАЛ АКУНВА

АДЕТ ТИРВАЛ, гъар йисуз августдин вацран эхиримжи гъафтада, акъалтарнавай келунин йисан нетижаяр кунин ва цийи келунин йисаз гъазурвал акунин гъакъиндай малимрин августдин совещание кыле тухузвайди я. Совещаниедин вилик чи корреспондент Афисат Айдемирова МР- дин образованиедин Управлениедин начальникдин заместитель Айна Гъажиевадихъ галаз гъуръшмиш хъана ва са шумуд суал гана.

-Айна Лазаревна, МР- дин образованиедин идарайра цийи келунин йисаз гъазурвилер акунин кваллахар гыи гъалда ава?

-Къенин юкъуз Магъарамдхуърун райондин образованиедин идарайра, дараматар цийи келунин йисаз гъазурунин кваллахар тамамвилелди акъалтарнава. Цийи келунин йисузни «Образование 2019-2024- йисара» милли проект тамарунихъ элкъурнавай кваллах давамарда. Райондин образованиедин хиле къенин юкъуз 58 идара кардик ква. Абурукай 33 юкван школада 7200 чирвилер къачуда ва 812 аял сифте яз партайрихъ ацукъда. Кардик квай 20 бахчада 1497 аялдиз тербия гуда. Ругуд йисалай цемужууд йис жедалди яш авай 4500 аялдивай алава образованиедин 5 идарадин къуллугърикай менфят къачуз жеда. Вири санлай къачурла райондин 18 школада къве сменади кваллахзама.

-Райондин школайри гыихътин проекта иштиракзава?

-Дагъустан Республикадин МР- ра хъсан еридин образование гунихъ элкъурнавай «100 школа» проект тамаруниз къетлен фикир гузва. Ик1, 2021- йисуз и проектда район-



дин ругуд школади иштиракна. И проектда иштиракдай мумкинвал хъун патал райондин меценатри чпин такъатрикай школайриз куьмек яз 2,5 миллион манат чара авунва. Алай йисуз М.Гъажиеван тварунихъ галай юкван школада куьчедал алай спортдин майдандал эквер тунин кваллахар реестрдик кутунва.

«Гележегдин малим» федеральный проект тамарунин мураддалди 2021- йисуз райондай 98 малим пешекарвал хкажзавай курсариз фенва. 2019- йисалай башламышна «Алай аямдин школа» федеральный ва «Образование» милли проектрин сергъятра аваз районда «Точка роста» лишандик кваз цифровой образованиедин вад центр ачухна. 2021 ва 2022- келунин йисуз, тлеби илимрихъ

ва технологийрихъ элкъурнавай пуд центр ачухун фикирдик ква. И центрайра тухузвай кваллах акъалтзавай несилдиз алай аямдин еридин образование гунихъ элкъурнавайди я.

-Винидихъ раханвай центрайра ачухуниқди образованиедин хиле аквадай дегишвилер авани?

-Гъелбетда, месела 2020 ва 2021- келунин йисуз ЕГЭ- рин нетижаяр кърла ва алатай йисав гекъигайла, урус члал, физика, обществознание хътин предметрай юкван балл са къадар артух хъанва. «Гъар са аялдин агалкъун» проект райондин сергъятра тамамарун фикирда аваз, райадминистрациядин къарардин бинедаллаз, «Аялрин яратмишунрин райондин центр» МБУДО- дин базадал алава образованиедин муниципальный даяхдин центр тешкилнава. «Демография» милли проектдин сергъятда аваз, цийи келунин йисуз

Магъарамдхуьре 60 аял гъакъдай цийи бахча кардик акатда.

-Айна Лазаревна, вири дуьньяда хъиз, чи уьлкведа авай пандемиядин гъаларин гъакъиндай квевай вуч лугъуз жеда?

-Къенин юкъуз коронавирусдин инфекциядихъ галаз женг члугун тлал алай месэладиз элкъвенва. И уьзуьрди образованиедин системадин кваллахдани къетлен дегишвилер тунва. Къенин юкъуз чаз виридалай багъади инсандин сагъламвал я. Иниз килигна, цийи келунин йис алуькдалди Роспотребнадзордин истемешунрал, меслятрал амал авунин карда вири серенжемар кыле тухванва.

- Сугъбет авунай чухсагъул.

КОВИД 19

САГЪЛАМВИЛИЗ
КЪЕТИЕН ФИКИР

ОБЩЕСТВОДИН сагъламвал хуьнин, коронавирусдин инфекциядин вилик пад къунин мураддалди районда къетIен кIвалах тухванва ва и жигъетдай кIвалах давам жезва. Югъ-йикъандавай вакцина ишлемишзавайбурун къадар ар-тух жезва.

Августдин вацра районда 237 кас азарлу хъана, абурукай 161 кас ковид ва 76 кас стIалжем хъанвайбуру я.

2020- йисан майдин вацралай инихъ 1215 кас ковиддик азарлу хъана. 1004 сагъ хъана кIвалериз ахъайнава ва 211 кас гъеле начагъзама. Больницадиз татана кIвалин шартлара стIалжемдик азарлу хъайи 478 касдикай 398 сагъарнава ва 80 начагъзама. Амбулаторный къайдада 78 кас сагъарзава. Алай вахтунда Магъарамдхуруьн ЦРБ- дин стационарда 46 кас коронавирусдик азарлу ва 28 кас стIалжемдик азарлур ава. Лап четин гъалда авай къуд кас Махачкъаладиз рекъе тунва. ОРВД- дик 2855 азарлу хъана ва абурукай 2763 кас сагъарнава.

Майдин вацралай къенин йикъалди 47 608 касди тестар вахканва. Агакънавай 5408 дозайкай 4398 ишлемишнава. Райондин больницада вакцинация ийизвай къве пункт, чкадал фена вакцинация ийизвай мо-

бильный пункт ва амбулаторийрин базайрал чкадал фена вакцинация ийизвай ирид бригада кардик ква. Ковиддик ва стIалжемдик азарлур патал Магъарамдхуруьн ЦРБ- да 60 койка- чка



гъазурнава. Роспотребнадзордин истемишунрал амал авуна 278 кас патарив гвайбурувай чара авунва. Арадал атанвай гъалар хъсан жедалди банкетный залрин, кальянийрин кIвалах акъвазарнава. Азар пайда хъайи 197 чкада дезинфекциядин кIвалахар тухванва.

Райондин образованиедин идарайра дезинфекциядин къаришмаяр, кварцдин лампаяр ва са жерге алатар ишлемишуналди гъар юкъуз дезинфекциядин кIвалахар къиле тухузва. Образованиедин хиле

кIвалахзавай 2500 работникди анализ вахкана ахтармишунар тухванва.

Коронавирусдин инфекция лап хаталу уьзуьррикай сад тирди чаз виридаз малум я. Вахтунда вакцина ишлемишун

уьзуьрдин вилик пад къадай, жув ва жуван багърияр хаталувиликай жкудай мумкинвал гуда. И уьзуьрдик чи райондай 29 кас, яни 12 кас Магъарамдхуруьн, 11 кас Махачкъаладин ва 6 кас Дербентдин больницайра къена. Абуру шекердин диабетдин, гипертониядин ва дуркIунрин хронический уьзуьрар авайбуру тир.

Вакцина ийиз нубат къазвай ксаривай : 8-928-286-35-37 нумрадин телефондиз зенг ийиз ва я Госуслугайрин порталдай кхъиз жеда.

А. АЙДЕМИРОВА.

ЙИКЪАН ТЕМА

ШКОЛА, чирвал, тербия, камаллувал, савадлувал дуъньядал вири уълквейра сад лагъай чкадал алай месэлаяр я. Россияда лагъайтла, чирвилеризни тербия гуниз, акъалтзавай несил савадлуди хъуниз иллаки къетлен фикир гузва. И кардихъ еке метлеб ава. Гъикл лагъайтла, гъар са гусударстводиз акъалтзавай несил савадлу авуналди жуъреба-жуъре пешекарар

гъафтеда кьиле тухузвай аппаратдин совещаниедал образованиедин Управлениедин начальник У. Абейдуллаеван докладдихъ яб акалзава. Адаз алава суалар хгузва. Кьилди къачуртла, районда школаяр авай гъал, абур та-даракламиш хъун, ремонтар кьиле тухвана кланзавай чкаяр ахтармишун ва икл мад.

Амма и кардиз генани артух фикир гун патал

рациядивай, я чи Республикадивай гъелелигда районра школаяр эцигуниз гъил яргъи авуна куъмек гуз жезвач.

Гъаниз тамашна чун, районэгълияр чахъ авай школадин дараматар хуъз алахъна кланзава. Алай вахтунда чи районда куъгъне хъанвай школайрин дараматар са шумуд хуъре ава.

Райондин администрацияди гъар йисузуз вичи-

МАД ВУЧ АВУН ЛАЗИМ Я?

герек къезва. Гъар са девирдин пакагъан югъ, гележег гъабурун гъиле ава, яни акъалтзавай несилдин. Чи гележег савадсузди тахъун патал гусударстводи школаяр, чирвал ва тербия къачудай маса чкаяр тешкилзава.

Акъалтзавай несилдин савадлувал хкажуниз, ам артухаруниз алай аямдани къетлен фикир гузва. Чи районда лагъайтла, клелунин, чирвал къачунин процесс югъ-къандавай хъсанарунин мураддалди образованиедин маканра жуъреба-жуъре тематикадин, школаяр, классар тадаракламишунин клвалахар егин еришралди кьиле тухузва. Муниципальный райондин кьил Фарид Агъмедова и кар патал, яни райондин образованиедин маканра чирвилерни тербия, савадлувал артухаруниз гъамиша къетлен фикир гузва. Райондин администрацияда гъар

пулдин такъатар герек я. Са бязи клвалахар финансрихъ галаз алакъалу жезва. Райондин бюджетдин масштабра а клвалахар тешкилиз хъун мумкин туш. Райондин бюджетдин такъатралди тешкилиз тежезвай клвалахар гъихътинбур я? Районда школайрин цлийи дараматар эцигун. Ихътин эцигунрин клвалахар авун патал алава куъмекар, пулдин такъатар герек къведа. Гъинай ва нивай? Республикадивай, Федерациядивай.

Амма алай вахтуна дуъньяда авай гъалар сеbeb яз я Республикадивай, я Федерациядивай районда школайрин дараматар эцигуниз куъмек яз гъил яргъи ийиз жезвач. Исятда Евросоюзди, Америкади Россиядиз акси яз къабулнавай серенжемрин не-тижа яз чи Гъукуматдин бюджетдиз миллиард долларрин зиян ганва. Ихътин татугайвилер хъуниз тамашна Россиядин Феде-

вай жедайвал, райондин бюджетдин такъатар кьенят

ийиз, вилик акъвазнавай важиблу маса рекъериз артух пул харж тийиз, са жедай къайдада школаяр ремонтзава.

Эгер чна чи райондин школаяр маса районра авай школайрин гъаларихъ галаз гекъигайтла, чаз анай аквада хъи, чи гъалар акъван писзавачирди. Амма, гъакл ятлани, чи райондин руководство идалди секин хъана акъвзнавач. Муниципальный райондин кьил Фарид Агъмедова и жигъетдай РДдин Правительстводиз чарар рекъе тунва, РДдин Кьил хабардар авунва. Мад вуч авун лазим я?

И суалдиз жаваб чна, районэгълийри гана кланда. Чна вирида и татугайвилериз таб гана, гъелелиг авай гъаларал рази хъана чи аялрив клелиз туна кланда.

Р. МУРАДАЛИЕВ.

ДИН ВА ИНСАН

БИНЕСУЗ ФИКИРАР – ВИРИДАЛАЙНИ ПИС ФИКИРАР Я

ЧИ девирда инсанрин арада гзаф кьадар чIуру адетар ва нагъакъан хесетар гегъенш хъанва. Гунагъар ава, чаз абур ийиз кичIезвай ва гунагъар ава чна регъятдиз ийизвай. Ахътинбурук гъибет, буюгътен акатзава. И гунагъди инсанри гъар юкъуз ийизвай ихтилатра кьилин чка къазва ва адакай Аллагъди Вичин кьетIен регъим авунвай ксар квачиз са касни хвенвач. И чIуру хесет виринра гегъенш хъанва ва пис начагъвили хъиз, гзаф инсанар азарлу авунва. Вирида хиве къазвайвал и хесет алчач ва эдебсуз карятIани, гъибет неинки инсанрин рахунра, гъакI интернетдани ава. Интернетда маса касдивай ам алачир чкадал лугъун ва я кхъин- им, адет яз, кичIевилихъ галаз алакълу я. Макъаладин мурад а инсанар тахсирлу авун туш, мурад газет кIелзавайбурал Аллагъдин вилик а гунагъдин заланвал къалурун я.

Хузайра ибн Яманиди агакъарай Пайгъамбардин якъин гъадисда лагъан-

ва: «Гъибетчи Женнетдиз гъахъдач».

Дуъшуъш

Къадим заманайра са девлетлу касдиз са хъсан лукI гузвайди ақуна, амма лукI маса гузвайда адахъ авай тек са нукъсан- им адак квай буюгътен ийидай хесет тирди лугъузвай. Ада и нукъсан тIимил метлеб квайдакай гъисабна ва лукI маса къачуна. ГъикI ятIани, са сеферда и лукIра вичин иесидин

**«ЭГЕР вал са касди маса касдивай ван хъайи гафар агакъарзаватIа, чир хъухъ: ада вавай ван хъайидини масабурал агакъарда»
Гъасан аль-БАСРИ.**

папаз лагъана: «Я зи ханум, ви гъуълуъз вун кIанзамач ва адаз масадал эвленмиш жез кIанзава. Адаз вун кIан хъижедайвал вуна чукIул къачуна адан чурудай сакъве чIар атIутI». Ахпа ам иесидин патав фена ва лагъана: «Я зи агъа, ви папаз масад кIан хъанва ва йифиз вун тукIуна, вакай магърум жез кIанзава, эгер захъ ягъазвачтIа, вуна ксай амалар авуна, ам ви па-

тав чукIул гваз гъикI къведатIа килиг». Гъуълуъ адаз яб гана ва йифиз вич ксай амалар авуна ва паб чукIул гваз адан чурудал алгъайла, ам къуна ва яна къена. Идакай папан мукъвабуруз хабар хъана ва абур адан гъуъл яна къена. И кар сеbeb яз къве тухумдин арада дяве башламишна ва гзаф кьиникъар хъана.

Гъибетни, буюгътен виридалайни пис хесетар я. А хесетар квай инсандиз дувандин юкъуз кIеви жаза гуда, вучиз лагъайтIа, ада гузвай зиян зурбади я. И гунагъ авунал инсан шейтIанди гъевеслу ийизва, адан мурад- инсанрин арада душманвал ва такIанвал тун, абур шадвиликай ва секинвиликай магърум авун я.


Къенин юкъуз гъибетни буюгътен лап гегъенш хъанва. Жув гъикI тухуда, эгер вал хуш текъвер хабар агакъарайтIа? Ахътин дуъшуъшда чна теклифзава бязи дибрал амал авун. Сад лагъайди, абур дуъз гафар яз къабул тавун. Къвед лагъайди, квел никай хабар агакъарнаватIа, гъадакай пис фикир тавун. Пуд лагъайди, ахътин хабар агакъарайди насигъат ийиз, адан амалдин алчачвал къалуриз, мад ахътин ихтилатар тавуникай игътиятлу авун. Къуд лагъайди, квел агакъарай ихтилатар масадал агакъар тавун.

Материал

**«Ас-салам» газет-
дай гъазурна.**

МАЙВАЯР, емишар, къацу хъчар хийирлу я лугъудай фикир гегъеншдиз чкланва. Амма и фикир гъакъикъатдивай са тлимил яргъа я. Чна ишлемишзавай гзаф набататар хаталубур, зиянлубур хъун мумкин я, абур дуъз ишлемиш тавурла гъатта залан азарарни арадал гъун мумкин я.

Хъарпуз



ХЪАРПУЗ, шекер гзаф квай маса емишар хъиз хуквада ва ратара цурурзава. Эгер ам хуквада цурурна кланзавай маса хуьрек-рихъ галаз ишлемишайтла, ам хуквада амукъуналди тадиз гъал жеда ва ада цур къачуналди гзаф азарар арадал гъида. Туьннин къайда- хъарпуз, гатун хали хъиз, маса продуктар галачиз хуьрек туьр 1,5-2 сятинилай ва я гишин руфунал туьна кланда. Хъарпуз фахъ галазни туьн меслят къалурзава. И карди ратара гзаф газар кватл хъунал гъида. Хъарпуз диабетдик азарлубуруз, ратара гзаф газар кватл хъунин азиятдик квайбурузни виже къведач.

Ципицлар



ТАЗА, анжах члередикай атланвай ципицри ратара гзаф газар кватл хъунал гъида. Гъавиляй абур члередикай атлай 2 йикъалай туьн хъсан я. И кар хуквадин, ратарин, дуркунрин ва цварадин рекъерин азарин тади гузвайбур патал гзаф важиблу я. Хамар ва цилер гадарун хъсан я. Хам хуквада геж цразва ва газар

арадал гъизва. Гзаф къадар органический кислотаяр галайвиляй ципицри сарарин эмаль харапл хъунал гъизва. Гъавиляй ам туьрдалай къулухъ тлимил хуьрекдин сода галай яд сиве экъуьрун герек я.

Банан

АТИУГЪАЙ, къайи ва ламу гъава авай чкада яшамеш жезвай, «руьгъдиз ва бедендиз» зайиф, гъамиша гъамуник квай хътин инсанар патал бананан зиянлу я.



Себеб бананрин кьетленвиле ава: абур явашдиз цразва, ратара гзаф газар арадал гъизва, гъа са вахтунда тукъуьлни заландиз алатзава. Абур гишин члавуз туьн зиянлу я, цихъ галаз туьн мадни зиянлу. Ивидин иквивал артухардай хесет квайвиляй бананар тромбозит ва варикозное расширение авайбурухъ галазни къадач.

Машмаш

МАШМАШРИН цилери ва хвехвери заландиз зегъерламиш хъунал гъида лагъана ни фикирда? И карда хвехверик квай амигдалин тахсирлу я. Ам хуьрек цурурзавай чкада члур жезва ва гужлу зегъер тир синильный кислота арадал гъизва. Эгер са шумуд цил туьртла, организмдин гзаф амигдалин агакъдач.

Гзаф хвехвер туьрла 0,5-5 сятинилай зегъерламиш хъун мумкин я. Адан лишанар: туьд чухвазвайди хъиз жеда, сивихъ къведа, беденбуш, къил тла жеда, экъуьчда, кичевал акатда. Залан дуьшуьшра таб акъалтда, жув жувакай квахъда.

Ихътин дуьшуьшда вахт ахъаймир, духтурдиз эвера! Сифте куьмек це- руфун яд яна михъа.

Риклеп хуьх, машмашар гишин руфунал, гъакл яклуьн ва крахмал квай хуьрек туьрдалай къулухъ туьна виже къведач. Ида хуьрек цурурун къайдадикай жудун мумкин я. Эгер машмашар туьрдалай къулухъ къайи яд хъвайитла, къенин азар акатун мумкин я. Таза машмашар язвадин уьзуьрар ва хци гастрит авайбурузни зиянлу я. Гзаф шекер квайвиляй машмашар, иллаки къуранвайбур, шекердин диабетдик азарлубуруз туьн къадагъа я.

Бадамжан

БАДАМЖАНАР тамамвилелди дигмиш хъайила абурку квай соланиндин активный алкалоиддин къадар сад лагъана артух жезва. Гъавиляй, туьн патал тазазмай ва гъвечибуру ишлемишна кланда. Соланиндилай зегъерламиш хъайитла, рикл элкъведа, сивихъ къведа, къен фида, ратарай тларар яда, таб акъал-



тда, нефес дар жеда. Ихътин лишанар малум хъайивалди, тадиз духтурдиз эверна, ахпа азарлудаз сифте куьмек це: адав тухдалди нек, какадин лаз хъваз тур.

Къавурмишнавай бадамжанар хуквадинни ратарин трактда цуруриз жедач. Амма, гъайиф хъи, кулинарудин рекъяй вири ктабар анжах гъа ихътин рецептрай ацланва. Бадамжанар ргав ва парламишиз жеда, амма къавурмишиз ваъ. И кар фикирда хуьх ва куь руфун тямлу зир-зибилдай ацурмир.

КВЕЗ ЧИДАНИ?

ВУЧИЗ МАГНИТДИН КОМПАСДИ КЕФЕР ПАД ДУЪЗ КЪАЛУРЗАВАЧ

АДЕТДИН магнитдин компасди кефер пад дуъз къалурзавач, вучиз лагъайтга, кефердин магнитдин полюс географиядин полюсдал ацалтзавач. Адалай артух яз, ам гъамиша са чкадай маса чкадиз физва. Исятда ам гъеле Канададин Арктикадин сергъятра ама, амма йисан къене 64 километрдин йигинвал аваз Таймыр галай патяхъ физва.

ЧАЙДИКАЙ ВА КОФЕДИКАЙ АВАЙ ГЕКЪИГУНИН ЗИЯН ЧПЕЛ ТЕЖРИБАЯР ТУХУЗВАЙ КЪВЕТХВЕРРАЛ ЧИРИЗ АЛАХЪАЙДИ ВУЖ Я?

ШВЕДРИН пачагъ III- Густава са сеферда вичи ахтармишун къетна- инсандиз квекай гзаф зиян ава: чайдикай ва я кофедикай? И кар ахтармишун патал, къиникъин жаза ганвай къве къветхвер хяна. Сад лагъайдаз йикъа пуд сеферда члехи фенжада авай чай гузвай, къвед лагъайдаз- кофе. Пачагъ вич ахтармишун акъалтдалди амукънач, ам яна къена. Къветхверар яргалди яшаммиш хъана, амма абурукай 83 йисан яшда аваз сифте къейиди чай хъвазвайди хъана.

ЦИН ХУРУЗ ФИН БАЛУГЪРИЗ ГЪИКЪВАН ЧЕТИН Я?



БАЛУГЪРИ цин хуруз фидайла, абуру секин це сирнав ийизвайдалай тИмил къуват харжзава. Идаз яд элкъезвай чкайрилай балугъриз менфят къачудай алакьун хъунал баян гуз жеда. Абуру асул кар алай жакIумриз лап тИмил гуж гуз са патай муькуь патаз къекъуьрунар ийизва. Сирнав авунин ихътин къайдада елкен алай чIехи луьткве гарун къаншардиз финихъ галаз гекъигиз жеда.

ГЪЕЛЕ ПИРР ПАЧАГЪДАЛ КЪВЕДАЛДИ ФАД ПИРРАН ГЪАЛИБВАЛ НИ КЪАЧУНАЙ?

«ПИРРАН гъалибвал» ибара- им кIаник акатуниз барабар гъалибвал я- арадал атун дегъ заманадин Грециядин Эпир гьукуматдин пачагъ Пирраз талукъ я. Чи эрадал къведдалди 279- йисуз адан къушунри римвийрихъ галаз хъайи дяведа гъалибвал къачуна, амма чпиз хъайи телефвилер акурла, Пирра лагъана: «Мад ихътин са гъалибвал хъайитга, зун къушун амачиз амукъда».

ПИСАТЕЛДИ ДУЪЗДАЛ АКЪУДНА



НЕМСЕРИН писатель Норман Олера Адольф Гитлер наркоман тирдан патахъай малумарнава. Идан гъакъиндай Олеран цийи ктабда фюрерди ва адан гъилик кIвалахзаваз хъайи ксари жуьреба-жуьре наркотикар- кокаин, героин, метамфетамин ва морфин ишлемишиз хъайидан гъакъиндай хъизва.

Ктабдин автордин фикирдалди, фашистрин Германиядин къушунар Франциядиз сухулмиш хъунин кIвалахни наркотикрин таъсирдик кваз къилиз акъудайди я.

Метамфетомин ва я перфитин вичин вахтунда немсерин ТемплерВерке фирмади арадал гъайиди я. Гуьгъунлай и препарат гуьгъуьл жкаждай шей яз лап жуьреба-жуьре пешейрин иесийри гегъеншдаказ ишлемишиз башламишна.

Идалайни гъейри, первитин ширинлухрик, гъа гъисабдай шоколаддикни кутаз хъана. Первитин ишлемишзавайбурун арада немсерин армиядин аскерарни авай. А чIаван бязи пешекарри гъисабиз хъайивал, и препарат юхсул хъуникай хуьдай хъсан такъат я. Аскерриз дяведин девирда гъамиша вахт-вахтунда бес къадар суьрсет гъат тийизвайвиляй, абуруз юкъуз первитиндин са таблетка, йифизни 3-4 таблетка хъун меслят къалурнавай.

ИНФОРМАЦИОННОЕ СООБЩЕНИЕ

Информация об итогах рассмотрения заявок на участие в аукционе, назначенного на 16.08.2021 года:

1)ЛОТ №1- земельный участок:
адрес: РД, Магарамкентский район, с. Чахчах-Казмаляр;
площадь- 100 кв.м.;
обременения- отсутствуют;
кадастровый номер 05:10:000020:885;
целевое назначение- для предпринимательства;

категория земель- земли населенных пунктов;
вид права- долгосрочная аренда сроком на 10 лет;
начальная цена 2699,96 рублей;
шаг аукциона 3% от начальной цены- 80,99 рублей;
размер задатка 20% от начальной цены рублей- 539,99 рублей.
Победитель аукциона: Алиева Сания Алиевна.

Информация об итогах рассмотрения заявок на участие в аукционе, назначенного на 23.08.2021 года:

1)ЛОТ №1- земельный участок:
адрес: РД, Магарамкентский район, с. Гильяр;
площадь- 5000 кв.м.;
обременения- отсутствуют;
кадастровый номер 05:10:000056:678;
целевое назначение- сельскохозяйственное использование: для сельскохозяйственного производства;
категория земель- земли сельскохозяйственного назначения;
вид права- долгосрочная аренда сроком на 49 лет;
начальная цена 981 рублей;
шаг аукциона 3% от начальной цены- 29,43 рублей;
размер задатка 20% от начальной цены рублей- 196,2 рублей.
Победитель аукциона: Казиахмедов Казиахмед Казиахмедович.
2)ЛОТ №1- земельный участок:
адрес: РД, Магарамкентский район, с. Гильяр;

площадь- 5000 кв.м.;
обременения- отсутствуют;
кадастровый номер 05:10:000056:679;
целевое назначение- сельскохозяйственное использование: для сельскохозяйственного производства;
категория земель- земли сельскохозяйственного назначения;
вид права- долгосрочная аренда сроком на 49 лет;
начальная цена 981 рублей;
шаг аукциона 3% от начальной цены- 29,43 рублей;
размер задатка 20% от начальной цены рублей- 196,2 рублей.
Победитель аукциона: Рамазанов Ислам Рамазанович.
Заместитель главы администрации МР «Магарамкентский район»
С.Г. Мурадалиев.

Обращение

Уважаемые граждане сел. Магарамкент!
В связи с обнаружением многих фактов использования питьевой и поливной воды жителями сел. Магарамкент не по назначению, приводящих к повреждениям дорог села и антисанитарии, убедительно просим Вас навести порядок в Ваших хозяйствах по недопущению подобных фактов и отнестись к нашему обращению с должным пониманием.

Глава Администрации СП
«сельсовет « Магарамкентский» **А.М.Муслимов**

Муьгъверганрин
СОШ-дин 11- класс куть-
тягъайдан гъакъиндай
2012- йисуз Абдулсамедов Джабраилаз гайи 05
АБ 0068054- нумрадин
аттестат квахъуниз килигна къуватда амачирди яз гъисабин.

<p>Къилин редактор Р. АБДУРАГЪИМОВ.</p>	<p>Учредитель: Администрация муниципального района «Магарамкентский район». Адрес: 368780. РД, Магарамдхуьруьн район, Магарамдхуьр, Гагаринан куче, 2.</p>	
<p>Редакциядин адрес: 368780. РД, Магарамдхуьруьн район, Магарамдхуьр, Ленинан куче, 4.</p>	<p>Газета «Самурдин сес» (Голос Самура) зарегистрирована Региональным управлением Комитета РФ по печати в РД.</p>	<p>Газетдин регистрациядин нумра- Д 0174 Газет ООО «Самур» типографияда гъазурна ва гъана чапна. Типографиядин ва издателдин адрес: 368780. РД, Магарамдхуьруьн район, Магарамдхуьр, Ленинан куче, 4. Лезги чӀал. Индекс 63340. Тираж 1400 Заказ № 35.</p>
<p>Газет гъафтеда садра акъатзава.</p>	<p>Чап ийиз вахкудай вахт - 16.00. Чапун патал къул чӀугуна- 15.00.</p>	
<p>Телефонар: редактор- 25-1-37, жавабдар секретарь - 25-1-39, бухгалтер-25-9-69.</p>		